



Dr Ueli isch e liebe Maa,
das gseet me iim vo Wyytem aa.
Denn Mensch und Tier het är sehr gärn,
und alles Böösi liggt iim färn.
Als Bundesroot, die hänn e Knall,
e soone Maa dä bruuchsch im Stall.

S Redbull wänn sii mir verbiete
Doch ooni das bin ich e Niete.
Mit däm Gsöff bisch voll im Saft,
s'weggt d'Läbensgaischter und git Kraft
Gits Redbull nimm, no kasch's vergässe,
denn muess au ych Viagra ässe.

Im Bläischuelhuus z'hinderscht hinde,
kasch die dymmschte Kinder finde.
D'Sprooch versteen si nit so rächt,
und au im Rächne sin si schlächt.
D'Lehrer sin jetzt am probiere,
d'Schwyzter Kinder z'integriere.

Zmitts in dr Nacht, so um die zwai,
schlyycht aine umme ganz elai.
Är suecht sich e dunggle Egge,
paggt dert uus und duet dra schmegge.
Es gfallt iim, dass dert niemerts faucht,
wenn är in Rueh si Stumpe raucht.

Es git so Dääg do bisch fruschtriert,
well dr numme Saich passiert:
- Bisch du Nintendo fasziniert,
bis dir di Färnseh explodiert.
- Kuum hesch di Huus frisch renoviert,
hett dir e Sprayer d'Wand verziert.
- Muesch du emol und het's pressiert,
doch findsch kai WC, isch's passiert
- Hesch dini Frau lycht provoziert,
denn landet s'Waalholz guet platziert.
- Kuum isch di Kaare uffpoliert,
hesch en in e Baum parkiert.
- Statt dr Blinddarm operiert,
do hän si dir s'Bai amputiert,
- Hett di dy Frau intim rasiert
und mit dr Klinge fascht kaschtriert.
- Wenn dr Chines ganz ungeniert,
zem Zmittag dir e Katz frittiert.
- Im Chef si Pitbull ungeniert,
dir iber d'Hose uriniert.
Wenn dir au so Saich passiert,
denn wisse mr, „mir sinn laggiert“

Dä Bischoff us Ängland dä isch nit ganz bache,
verzellt dr ganz Daag numme saubleedi Sache.
Zum Bäte do sotti är sini Händ falte,
doch ka'n är die räcti Hand nit dunde bhalte.
Dr Vatikan hätt'i viel weniger Dummi
wär'i dr Papscht nit so geege dä Gummi.

Sie, im Coop mit dääne Lupe,
am Salat gsehsch jedi Ruppe.
Und bim Fleisch muess ich grad motze,
s'duet vor luuter Tierli strotze.
My Frau maint nur: Du dumme Hagel,
dasch Drägg an dim Fingernagel.

Bi mir drhai es isch nit glooge,
sin mini Kinder voll uf Drooge.
Dä Schingge wo mir mänggmol ässe,
kunnt vo Säu, wo Hanf dien frässe.
Das isch die bescti Medizin,
so brucht mi Kind nimm Ritalin.

E Meersau derfsch jetzt nimm elai,
woone lo bi dir drhai.
Denn s'Tierschutzgesetz das nimmts genau,
bi Vogel, Fisch und Nager au.
My Frau die machts au diergerächt,
het nääbe mir e zwaite Hächt.

Unsri Evi Widmer Schlumpf,
hoggd richtig dief im Banggesumpf.
Em Ruedi Merz bloost sie dr Marsch
und steggd de Bangge Gäld in Arsch
Dr Minu meint daas isch e Hit
bi däm Spiil mach ych au mit.

Wenn d'Rumäne und d'Bulgare
mit em Merz in d'Schwyz wänn faare,
mien si zem dr Zoll passiere,
nit emol me d'Päss kopiere.
E mängge Schwyzer dä isch froo,
si Auti isch jetzt wieder doo.

Am morge frieh wenn z'Sunne lacht ,
dr Mörgeli in Laschter gracht.
Ärm und Bai kaputt, s'isch schyyter,
laider schwätzt är glych blööd wyter.
Do dra merggd me denn halt glii,
s'muess e Zircher sii.
Kuum gsund do macht dr Mörgeli
Immer wider Sörgeli
Schimpft är yber Asylante,
Demonstrante und Hydrante.
Do dra merggd me denn halt glii,
s'muess e Zircher sii.